

Nuuk, 5. marts 2015

UPA2015/148

Inatsisartut Suleriaasiata allanngortinneqarnera.

(Inatsisartut Siulittaasoqarfiat)

UPA 2015/149

Naalackersuinikkut sulinermit aningaasatigut tapiissuteqartarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. x, xx 2015-imeersoq.

(Partiinut nutaanut tunngaviusumik tapiissuteqartannginneq. Atuuffiit allat pillugit paasissutissiinngikkaanni qinigaanermut tapiissutisisinnaannginneq. Partiit sinnerlugit aningaasartuutinik ilanngaassisinnaaneq)

(Inatsisartut Siulittaasoqarfiat)

UPA 2015/150

Inatsisartuni Naalackersuisunilu il.il. ilaasortanut akissarsiaqartitsisarneq il.il. pillugit Inatsisartut inatsisaata allanngortinneqarnera pillugu Inatsisartut inatsisaat nr. x, xx 2015-imeersoq.

(Inatsisartunut ilaasortat il.il. sulinngiffeqarallarsinnaanerannut il.il. malittarisassanik Inatsisartut aalajangersaanerat)

(Inatsisartut Siulittaasoqarfiat)

Inatsisartut suleriaasiata, kiisalu Naalackersuinikkut sulinermit aningaasatigut tapiissuteqartarneq, aammalu Inatsisartunut Naalackersuisunullu il.il. ilasortat aningaasarsiaqartitaanerat, taamatullu Inatsisartunut ilaasortat sulinngiffeqarallarsinnaanerannut il.il. malittarisassanik Inatsisartut aalajangersaanerat pillugu tamannalu Partii Naleqqamiit oqaaseqarfigissavarput.

Immikkoortoq 148-mut Inatsisartut suleriaasiata allanngortinneqarnissaanik saqqummiussaag assiginngitsunik allannguutissanik imaqarpoq tamannalu siunnissami inatsisartuni sullissinermi suleriutsimik naleqqussaasoqarlunilu pisariillisaasoqarniarnera Partii Naleqqamiit soqutiginarparput.

Qinigaanerup misilinneqarnissaanut ataatsimiititaliamik pilersitsinissamut tunngavissat ersarissumik oqaasertalersorneqarnissaat pillugu suleriutsumik pitsanngorsaasoqarniarnera minnerunngitsumillu nalornisoortoqarsinnaajunnaarlugu tunngavissat oqaasertaanik aaqqissuussisoqarniarnera pissusissamisoortutut isigalugu taperserparput.

Kiisalu § 19 immikkoortoq 4. Tassalu siunnersiuinnermut ilisimatitsiffiusumilluunnit ataatsimiinnermi matoqqasumut tamanulluunnit ammasumik aggersaasoqarsinnaanerani periarfissiinissaq tassalu kikkulluunnit najussinnaaneranik ammaassinissaq tapersersornarpoq taamaalilluni aamma politikikkut ammanerusumik suliat ingerlanneqarsinnaanerat qularnaarneqartussanngormat.

Kiisalu apeqquteqaat aallaavigalugu oqallinnermi Inatsisartunut ilaasortat partiillu inatsisartut oqaaseqaatissaannut allannguutissamik siunnersuuteqarsinnaaneranut periarfissamik atuisinnaanissamik ammaassinissaq tapersersorparput.

Aammalu sukkulluunniit apeqquteqaat aallaavigalugu oqallinnissamik tunniussaqaarsinnaalernissaq periarfissatut ikkunniarneqartoq taperserlugu oqaatigissavarput.

Inatsisartunut ilaasortat nammineq atuffiitik inuussutissarsiutillu pillugit paasissutissiisarnissamik malittarisassiornissaq ataavartumik atuuttussanngorlugu aalajangersakkamik ikkussinissaq tamanullu ammasumik inatsisartut nittartagaat atorlugu atuuttussanngortitsinissaq annerusumik oqaaserfiginagu taperserparput.

Ataatsimiititaliat nutaamik ilaasortaasa naliliiffiqineqarnerat ataatsimiititaliat ilaasa ilaasortaata arfineq marlunniit ilaasortat tallimanut ikilineqarnissaat taperserparput.

Ilanngullugu inatsisartut suleriaasiata allanngortinneqarnissaanut eqqarsaatissatut ilanngunniarparput inatsisartuni ilaasortatut siunnersuuteqartarnermi suleriutsumik oqilisarneqarnissaa. Tassami assersuutigalugu sanaartugassamik siunnersuuteqaraanni suna tamaat inatsisartunut ilaasortanut naammassillugu suliariniartarnera assorujussuaq ajornakusoortarmat. Tassa aningaasanik qanoq naleqassanersoq aammalu aningaasat suminngaaniit tiguneqassanersut pinngitsoornani ilanngunneqartassasut piunnaasaqataammat.

Tamannalu assut naammassiuminaattarpoq tassami assersuutigalugu sanaartugassap siunnersuutaasup akiata naatsorsornissaa uagutsinnut ajornarluinnartutut taagaani pitsaaneruvoq naammassineqarsinnaananilu. Taamaattumik suleriutsumik allanngortinnissaa iluatsillugu siunnersuuteqarnermi suleriutsumik nalilersorneqarnissaat Partii Naleqqamiit kissaatigaarput.

Inatsisartunut siunnersuutit taamatullu aamma oqaaseqaatit pinngitsoornagit kalaallisuumiit qallunaatut taamatullu aamma qallunaatuumiit kalaallisumut nutsereerlugit aatsaat inatsisartut allattoqarfiannut tunniuteqqusaanerat nalilersorneqartariaqarpoq. Tassami iluemoorsinnaanngilaq assersuutigalugu kalaallisuinnaq allassimasumik inatsisartunut siunnersuuteqarutaa taava akuerineqarnaviannitsoq. Uffalu namminersoneq eqqunneqarmat pisortatigoortumik kalaallit oqaasii sullissinerni pisortaqarfinni tamani allaavigineqarlutik sulisoqartussaagaluartoq.

Taamaattumik ilanngullugu suleriutsip allanngortillugu suliarineqarnerani inatsisartut allattoqarfiannut inatsisartut ataatsimiinneranni siiunnersuutit, kiisalu naalackersuisunut apeqqutit apuuttartut kalaallisuinnaarlunnit allaqqagaluarpata tamanna uniffiginagu suliasatut tiguneqartarnissaat aaqqittariaqarmat sukumiisumik oqallisigineqassasoq Partii Naleqqamiit kissaatigaarput.

Ataatsimiititaliat sulineranni sinniisussanik atuisarnek massakkut suleriutsimut naleqqusarlugu inatsisartut allaffeqarfiat nalunaarfigalugu aaqqinniarneqartoq tamakkiisumik taperserparput

Partiinut aningaasatigut tapiissuteqarsinnaaneq partiinut inatsisartunut ilaasortaataqartunut tamakkiisumik atuuttusnaanera pissusissamisoortutut isigigaarput. Tassami aamma tulluarpallaanngilaq aamma partiit inatsisartunut ilaasortaataqanngitsut taperneqartalissappata, tamannalu ilaatigut atornerlunneqarsinnaanera eqqarsaatigalugu tulluarpallaanngilaq, partii inatsisartuni ilaasortaataqanngitsosq tapiissutinik tunngaviusunik tunissallugu. Aningaasanik tapiissutinik partiinut akiliisoqassappat pingitsoorani qinersinermi inatsisartunut ilaasortanngortitsisoqarpat aatsaat partiinut tapiissumik tunniussisoqassappat tamanna pissusissamisuuginnartoq Partii Naleqqamiit oqaatigissavarput.

Siunnersuutit sugaluurtulluunnit inatsisartut ukiuata naanerani naammassineqarsimangitsut atorunnaartarnissaanik siunnersuutaasoq annerusumik oqaaserfiginagu isumaqatigaarput, tassami aamma ilaatigut periarfissamik ikkussisoqarniarmat inatsisartunut ilaasortat imaluunniit Partiit suliap ingerlaqqinnissaanut kissaatigisaqarunik ikkussisoqarnissaanik kissaateqarsinnaallutik.

Taavalu inatsisartuni ilaasortat sulinngiffeqarsinnaaneranut tunngasut suleriutsip eqaallisarneqarnissaa Inatsiartut allattoqarfiat aqputigalugu suliat annertunerpaamik ingerlalernissaat saqqummiunneqartoq tunngavigalugu taperserparput, soorunami naammagittaalliortoqassappat inatsisartut siulittaasoqarfiat suliamik inaarissartussatut pissusissamisoorpoq.

Inatsisartunut ilaasortat sulinngiffeqarallartarnermut najuutinngikkallartarnermullu tunngasunik aalajangersaanissat pisariaqartinneqartut aaqqinniarneqarnerat pisussusissamisoorpoq, aammalu assigiinnerusumik sulinngiffeqarniarluni qinnuteqaatit aalajangersuiffigineqartarnissaat malittarisassiornissallu suliarineqarniarnerat tapersersornarpoq.

Kisianni aamma eqqarsarnartoqarpoq inatsisartunut ilaasortat sulinngiffeqarniarunik akuerineqarunillu sinniisussamik aggersaanermi inatsisartunut ilaasortat akiliuteqarnissa piumasaaqatigineqarsinnaasoq inatsimmut ikkunniarneqarmat. Tamannalu Partii Naleqqamiit ippinnartutut isigaarput. Tassami Inatsisartuni ilaasortaaneq inuiaqatigiinnit toqqagaanikkut suliassiissutitut pisussaaffiuvoq. Tamannalu eqqarsaatigissagaani tulluannngilaq inatsisartunut ilaasortat akiliisinneqartassappata.

Aammalu Inatsisartunut ilasortaq Naalackersuisutut atuunnermini inatsisartuni sulinngiffeqassaguni taava ilaasortaajunnaarnerisutut katersaqarsinnaanngilaq tamannalu

aamma eqqarsarnartoqartipparput isumaliutigilluarneqarnissaalu kammattuutigalugu.
Tassumalu ilaatigut kingunerisinnaavaa qinigaanngitsunik Naalakkersuisunut
ilaasortanngortitsisarnissaq siunissami atugaanerulissasoq.

Taamatut oqaaseqarluta ataatsimoortumik saqqummiussiissutit Partii Naleqqamiit
oqaaseqarfigaagut, neriutigalugu sapinngisamik tamatta akuerisinnaasatsinnik, aammalu
neriutigalugu inatsisartuni inatsisinik suleriutsinillu inatsisartunut ilaasortanut
naammaginarluartumik malitassaqarluta sulinissatsinnut.

Hans Enoksen